


प्रसार भारती
प्रादेशिक समाचार एकांश
आकाशवाणी रायपुर (छत्तीसगढ़)
प्रादेशिक समाचार बुलेटिन

18.45 सोमवार

दिनांक 31.08.2026



प्रमुख समाचार –

- 1— मुख्यमंत्री ह आज नवा रईपुर म खनिज ब्लॉक्स के नीलामी के आठवां किस्त के रोड सो ल करीन संबोधित—एमा छत्तीसगढ़ के पांच खनिज ब्लॉक्स घलो हवय।
- 2— छत्तीसगढ़ म स्वाइन फ्लू के मामला सरलग बाढ़त हे— प्रदेश म अब तक एक सौ तीस मरीज मन म स्वाइन फ्लू के पुष्टि होय हे।
- 3— मौसम विभाग ह अवइया चौबीस घंटा के दउरान बलरामपुर अउ सूरजपुर के संगेसंग एखर ले लगे जिला म अतिभारी बरसा होय के देहे चेतावनी।

अब समाचार विस्तार से

मिनरल ब्लॉक्स—रोड शो

मुख्यमंत्री ह किहीन हे कि छत्तीसगढ़ अब सिरिफ खनिज उत्पादन तक सीमित नइ हे, भलुक अनवेसन ले लेके एडवांस मैनुफैक्चरिंग अउ रिसाइक्लिंग तक पूरा मिनरल वैल्यू चेन विकसित करे जाही। एखर ले निवेस, उद्योग अउ रोजगार के मउका बाढ़ही।

मुख्यमंत्री ह आज नवा रईपुर म क्रिटिकल अउ स्ट्रेटेजिक मिनरल ब्लॉक्स के नीलामी के आठवां किस्त के रोड सो ल संबोधित करत रिहीन। ओमन किहीन कि लिथियम, ग्रेफाइट, रेयर अर्थ एलिमेंट्स, निकेल अउ वैनैडियम जइसन खनिज रक्षा, आर्टिफिसियल इंटेलिजेंस, इलेक्ट्रिक मोबिलिटी अउ क्लीन एनर्जी जइसन क्षेत्र बर बहुत जरूरी हे।

मुख्यमंत्री ह बतइन कि नीलामी के ए किस्त म देस के बीस ठिन खनिज ब्लॉक्स सामिल हे, जेमा छत्तीसगढ़ के पांच ब्लॉक्स घलो हवय। ओमन निवेसक मन ले अपन भागीदारी देके बिनती करीन।

ए मउका म मुख्यमंत्री ह ई-रेत संगवारी पोर्टल अउ टिन पोर्टल के सुभारंभ करीन। ई-रेत संगवारी पोर्टल ले प्रधानमंत्री आवास योजना के हितग्राही मन ल रियायती दर म रेत मिलही अउ टिन पोर्टल ले दंतेवाड़ा के आदिवासी परिवार मन ल उंखर उपज के सही भाव मिलही।

कारीकरम म छत्तीसगढ़ खनिज विकास निगम ह इंडियन ओवरसीज बैंक अउ पंडित रविशंकर शुक्ल विश्वविद्यालय के संग कौशल विकास अउ वित्तीय मदद बर दू ठिन बड़का समझौता घलो करीन।

कारीकरम म केंद्रीय राज्य मंत्री तोखन साहू कोयला अउ खान राज्य मंत्री सतीश चंद्र दुबे अउ खान मंत्रालय के बड़का अधिकारी मनके संगेसंग उद्योग जगत के प्रतिनिधि मन घलो सामिल होइन।

राष्ट्रपति-दीक्षांत समारोह

राष्ट्रपति द्रौपदी मुर्मू ह किहीन हे कि कपड़ा अउ परिधान क्षेत्र न सिरिफ भारत के सांस्कृतिक विरासत के बड़का हिस्सा हरय, भलूक एहा लाखों लोगन मन ल रोजगार अउ आजीविका देवत हे। राष्ट्रीय फैसन प्रौद्योगिकीय संस्थान-निपट के दीक्षांत समारोह ल संबोधित करत ओमन छात्र मन ल देस के सांस्कृतिक विरासत अउ मूल्य ले जुड़े रहिके वैश्विक नजरिया अपनाय के बिनती करीन। बछर दू हजार सैंतालीस तक विकसित भारत के संकल्प म युवा मन ले योगदान देके आह्वान करत राष्ट्रपति ह किहीन कि छात्र मन ल नौकरी तलासे वाला नइ बनना चाही, भलूक रोजगार देवइया बने के परयास करना चाही।

स्वाइन फ्लू-मरीज

छत्तीसगढ़ म स्वाइन फ्लू एच वन-एन वन के मामला सरलग बाढ़त हे। स्वास्थ्य विभाग के आंकड़ा के मुताबिक प्रदेश म अब तक एक सौ तीस मरीज मन म स्वाइन फ्लू के पुष्टि होय हे, जेमा ले इकतीस जिन सक्रिय

मरीज हवय अउ निनान्बे मरीज मन ईलाज के बाद ठीक हो गेहे। विभाग के मुताबिक प्रदेस म अब तक स्वाइन फ्लू ले एको मरीज के मउत नइ होय हे।

राजधानी रईपुर म तीन झिन नवा मरीज मिले के संगेसंग जिला म संक्रमित मरीज मनके आंकड़ा बाढ़के साठ हो गेहे। ग्यारा झिन सक्रिय मरीज हवय। एखर अलावा दुरुग, रायगढ़, बिलासपुर, धमतरी, कोरबा, बेमेतरा अउ महासमुंद के संगेसंग आने जिला मन म घलो सक्रिय मरीज हवय।

इही बीच, स्वास्थ्य विभाग ह लोगन मन ले खुदे दवा नइ ले अउ लक्षण दिखे म जांच कराय के अपील करे हे।

राज्यपाल—मुलाकात

राज्यपाल रमेन डेका ले आज लोकभवन म छत्तीसगढ़ राज्य निर्वाचन आयुक्त अजय सिंह ह सौजन्य भेंट करीन। ए दउरान ओमन राज्यपाल ल आयोग के कामकाज के बारे म जानबा दीन।

उहें, छत्तीसगढ़ लोक सेवा आयोग के अध्यक्ष रीता शांडिल्य ह घलो राज्यपाल ले मिलिन। ए मउका म ओमन राज्यपाल ल छत्तीसगढ़ राज्य लोक सेवा आयोग के एक अप्रैल दू हजार पच्चीस ले इक्तीस मार्च दू हजार छब्बीस तक के बेरा के पच्चीसवां वार्षिक प्रतिवेदन सौंपिन।

यूसीसी—सुझाव बैठक

समान नागरिक संहिता—यूसीसी ल लेके रईपुर के गुरु घासीदास ऑडिटोरियम म काली एक सितंबर के मुस्लिम समाज के बइठका होही। जेमा बुद्धिजीवी मन ले यूसीसी ले जुड़े सुझाव ले जाही। छत्तीसगढ़ राज्य वक्फ बोर्ड के अध्यक्ष डॉक्टर सलीम राज ह बतइन कि मिले सुझाव ल राज्य स्तरीय यूसीसी समिति के सदस्य मनके आगू पेस करे जाही।

सेना भर्ती—रैली

छत्तीसगढ़ के जम्मों तैंतीस जिला मनके कॉमन एंट्रेंस एग्जाम—सीईई म पास उम्मीदवार मन बर सेना भर्ती रैली राखे जाही। ए रैली मध्यप्रदेस के सागर स्थित इंदिरा गांधी इंजीनियरिंग कालेज म होही। सिपाही फार्मा अउ सिपाही तकनीकी नर्सिंग सहायक पद बर उम्मीदवार मन ल बारह अक्टूबर अउ अग्निवीर महिला सेना पुलिस पद बर चौदह अक्टूबर के रिपोर्ट करना होही। योग्य उम्मीदवार मन ल प्रवेस पत्र ज्वाइन इंडियन आर्मी के वेबसाइट अउ उंखर ई-मेल म भेजे जा चुके हे।

उपमुख्यमंत्री—आदिवासी महासम्मेलन

उपमुख्यमंत्री अरुण साव ह बेमेतरा म जिला स्तरीय आदिवासी महासम्मेलन म सामिल होइन। ए मउका म ओमन शहीद वीर नारायण सिंह के मूर्ति के अनावरण करीन। कारीकरम के दउरान श्री साव ह गोंडवाना भवन के जीर्णोद्धार बर दस लाख रुपिया अउ बेमेतरा म आने—आने बिकास काम बर छै करोड़ रुपिया देके घोसना करीन।

कृषि विश्वविद्यालय—काउंसलिंग

इंदिरा गांधी कृषि विश्वविद्यालय म बीएससी कृषि ऑनर्स पाठ्यक्रम म प्रवेस बर स्पॉट काउंसलिंग आज ले सुरु हो गेहे। ए काउंसलिंग दू सितंबर तक कृषि महाविद्यालय रईपुर म बिहनिया नौ बजे ले संझा साढ़े पांच बजे तक चलही। चुने गे अभ्यर्थी मन ल दस्तावेज परीक्षण, महाविद्यालय आवंटन अउ ऑनलाइन फीस जमा करे के काम ल पूरा करे बर पड़ही। विश्वविद्यालय ह एखर ले जुड़े दिसा निरदेस अपन वेबसाइट म जारी करे हे।

नंदनवन—पुनर्विकसित

रईपुर जिला के अटारी गांव म स्थित नंदनवन ल एक घांव फेर बने ढंग ले बनाय जाही। आज मंत्रालय म होय एक ठिन उच्च स्तरीय बइठका म वन अउ जलवायु परिवर्तन विभाग के अधिकारी मन ह मुख्य सचिव के आगू नंदनवन पुनर्विकास के प्रस्तावित परियोजना ल पेस करीन। नंदनवन के विकास बर करीबन पचास करोड़ रुपिया के निवेस अनुमानित हे।

दुर्घटना

सारंगढ़-बिलाईगढ़ जिला म रायगढ़ रोड स्थित कुशल नगर के तीर आज ट्रक ले पिकअप गाड़ी ह टकरागे। ए घटना म दू झिन लोगन के मउकच म परान छूट गे अउ बारह झिन ले जादा यात्री मन घायल हो गेहे। घायल मन ल अस्पताल म भर्ती कराय गेहे। गाड़ी म पच्चीस ले जादा लोगन मन बइठे रिहीन।

“रंग तरंग”

प्रदेस के लोक संस्कृति, पारंपरिक संगीत अउ आधुनिक सुर के अनूठा संगम ल मंच देवाय के उद्देश्य ले काली एक सितंबर ले रईपुर म ‘रंग तरंग’ कारीकरम सुरू करे जाही। संस्कृति विभाग डहार ले होवइया ए कारीकरम रोजे संझा सात बजे ले महंत घासीदास संग्रहालय परिसर सिविल लाइंस म होही। कारीकरम के दउरान प्रदेस के पारंपरिक लोक वाद्ययंत्र के प्रस्तुति के संगेसंग अभी के संगीत मन के प्रस्तुति दे जाही। ए कारीकरम तीन सितंबर तक चलही।

मौसम

अउ अब पेस हे मौसम के हाल...

मौसम विभाग ह अवइया चौबीस घंटा के दउरान प्रदेस के उत्तर छत्तीसगढ़ बर रेड अलर्ट जारी करे हे। ए दउरान बलरामपुर अउ सूरजपुर के संगेसंग एखर ले लगे जिला म अतिभारी बरसा होय के चेतावनी दे गेहे।

मौसम विज्ञानी डॉक्टर गायत्री वाणी ह बतइन कि पश्चिम बंगाल अउ ओखर ले लगे उत्तर ओडिसा म एक ठिन निम्नदाब के क्षेत्र बने हे, जेखर असर ले प्रदेस म मानसून के गतिविधि बने हे। ओमन बतइन कि रईपुर के संगेसंग मध्य छत्तीसगढ़ के कोनो-कोनो जिला बर यलो अलर्ट जारी करे गेहे।

इही बीच, पाछू तीन दिन ले सरलग होवत बरसा ले प्रदेस के नदिया-नरवा म बाढ़ आ गेहे। आज घलो राजधानी रईपुर के संगेसंग प्रदेस के कतकोन जघा म हल्का ले मध्यम बरसा होय के समाचार मिले हे।

संक्षिप्त

अउ अब थोरकुन समाचार सार म –

– छत्तीसगढ़ मानवाधिकार आयोग के संयुक्त सचिव मनीष कुमार ठाकुर ल प्रतिनियुक्ति म विधि अउ विधायी कार्य विभाग म प्रमुख सचिव के पद म पदस्थ करे गेहे। ए बारे म सामान्य प्रशासन विभाग डहार ले आदेस जारी कर दे गेहे।

अउ

– राष्ट्रीय लोक अदालत बारह सितंबर के राखे जाही। छत्तीसगढ़ उच्च न्यायालय के मुख्य न्यायधीश रमेश सिन्हा ह आज लोक अदालत के तियारी ल लेके वर्चुअल बइठका लीन।

